


**TEZAUUR LITURGIC**  
**26 NOIEMBRIE**

**ACATISTUL**  
**SF. CUVIOS**  
**ALIPIE**  
**STÂLPNICUL**



**MOSCOW, 2000**



# **Акафист преподобному АЛИПИЮ СТОЛПНИКУ**

## **Кондак 1**

Избра́нный уго́днице Христов, преподо́бне отче наш Али́пие, восхваляем подвиги и труды твоя. Ты же, яко имѣяй дерзнове́ние ко Господу, моли дарова́ти душа́м нашим мир и ве́лию милость, да с любовью зовем ти: Радуйся, Али́пие, великий столпни́че и пресла́вный чудотворче.

## **Икос 1**

Ангелов и человеков Творец избра́ ты еще от утробы ма́терния, богоно́сне отче Али́пие, да прославиши пресвятое имя Его: Ангел бо явился еси на земли́, ангельское житие с плотию восприѐм. Мы же, ублажающе тя, глаго́лем си́це:

Радуйся, яко дру́гаго тя Самуи́ла из ма́терняго чрева Бог освяти́.

Радуйся, яко тебе ро́ждшуся, всю хра́мину света Божественнаго Госпо́дь исполни.

Радуйся, измла́да жизнь свою́ Христу всецело преда́вый.

Радуйся, все упование твое на милосердие Божие возложивый.

Радуйся, яко Божественная дарования Духа Святаго целити недуги и отгонити страсти приял еси.

Радуйся, яко Божия благодати исполнен, Ангелы возвеселил еси.

Радуйся, Алипие, великий столпниче и преславный чудотворче.

### **Кондак 2**

Видя Господь душу твою, преподобне, праведностию и благочестием сияющую, яко светильник пресветел на свещнице церковней ты утверди, да возможеш светозарными добродетельми твоими всяку душу, к тебе приходящую, благочестномудренно просвещати и научати хвалу воздавати Богу: Аллилуия.

### **Икос 2**

Разумом Небесным просвещаем, блаженный святитель Феодор, провидя благодать Божию, на тебе почившую, святе Алипие, Божественному Писанию ты научи, да в вере, надежде, любви и милосердии непрестанно пребывая, Христу Богу

угоден будеши. Сего ради, похваляя добродетели твоя, взываем тебе сия:

Радуйся, светило светозарное, чудес сиянии всю подсолнечную просвещающее.

Радуйся, столпе непоколебимый, монахов в подвигах многотрудных укрепляяй.

Радуйся, постников неистощаемое подкрепление.

Радуйся, колеблемым в вере незыблемое утверждение.

Радуйся, яко зной и хлад мужественно претерпел еси.

Радуйся, яко недуги страждущих исцелял еси.

Радуйся, Алипие, великий столпниче и преславный чудотворче.

### **Кондак 3**

Силою любви Божественныя свыше укрепляем, блаженне Алипие, сердце свое, яко ниву благоплодну, во сто крат у плодоноси́л еси, в добродетелех христианских непрестанно возрастая и Владыце Твоему со умилением воспевая: Аллилуия.

### Икос 3

Имея душу, страха Божия исполнену, еще от младых лет стяжал еси, Алипие, любовь у Бога и людей, мудростию же твоею не по возрасту своему преизбыточествовал еси. Мы же, дивяся ангелоподобному житию твоему, воспеваем ти сице:

Радуйся, истинною верою укрепленный.

Радуйся, Небесными дарованиями исполненный.

Радуйся, яко сердце твое жилище Духа Святаго явил еси.

Радуйся, яко крепость разума твоего в ополчении на врага показал еси.

Радуйся, демонов полки мужественно победивый.

Радуйся, на противныя прилоги непреклонен бывый.

Радуйся, Алипие, великий столпниче и преславный чудотворче.

### Кондак 4

Бури мирския суеты избегая, уединенныя жизни пламенне возжелел еси, угодниче Божий, да, в

священном безмолвии усердное служение Единому Богу принося и в богомыслии пребывая, выну воспевати Создателю твоему будеши: Аллилуия.

#### **Икос 4**

Слыша Господь моления твоя, богомудре Алипие, всели ты в пустынное место и укрепил на брань с легионами нечистых духов, научая побеждать их оружием Креста и стрелами молитв твоих. Мы же, восхваляя многия подвиги твоя, умильно вопием ти:

Радуйся, монахов столпе непоколебимый.

Радуйся, благочестия защитниче непреодолимый.

Радуйся, яко иноческое житие зело возлюбил еси.

Радуйся, яко Божественныя заповеди ревностно хранил еси.

Радуйся, притекавших к тебе учением веры оглашавый.

Радуйся, души, знобем греха опаляемые, водами веры орошавый.

Радуйся, Алипие, великий столпниче и преславный чудотворче.

### Кондак 5

Боготечней звезде уподобился еси, преподобне отче: ты бо, в псалмопении и молитвах упражняйся, от трисолнечнаго света Пресвятыя Троицы благодать приял еси утешати и наставляти приходящия к тебе, благодарно поя Богу: Аллилуия.

### Икос 5

Видяще пресветлый лик святыя великомученицы Евфимии, яже в видении чудно тебе предста и твоею спутницею и помощницею, по произволению Божию, себе наименова, храм во имя святыя девы сия воздвигнути потщался еси, богомудре отче. Мы же, радуясь сему, взываем ти сице:

Радуйся, иноческих обителей основателю.

Радуйся, монашеского жития устройтелю.

Радуйся, святых мужей и жен усердный почитателю.

Радуйся, добродетелям и подвигам их подражателю.

Радуйся, благолепия церковного любителю.

Радуйся, о службе Божией ревнителю.

Радуйся, Алипие, великий столпниче и преславный чудотворче.

### **Кондак 6**

Проповедницы подвигов твоих бы́ша  
приходя́щи от всех концев земли́ к столпу́, на  
не́мже ты, отче, подвизался еси, хлад и зной  
претерпевая и Подвигополо́жнику Христу  
прилежно поя: Аллилуия.

### **Икос 6**

Возсиял еси, яко светило богосвѣтлое, блаженне  
отче, путь спасения верным озаряя и в вере во  
Христа их утверждая. Сего ради и мы, тобою  
наставляеми, ублажаем тя и воспеваем сице:

Радуйся, уставов церковных хранителю.

Радуйся, молитвы непрестанныя совершителю.

Радуйся, постом и воздержанием страсти  
укроща́ти нас науча́яй.

Радуйся, всем взывающим к тебе предстателя  
пред Богом себе явля́яй.

Радуйся, в иночестем житии подвижающимся славный наставниче.

Радуйся, жаждущим истины сладостный источниче.

Радуйся, Алипие, великий столпниче и преславный чудотворче.

### **Кондак 7**

Хотя прославити место подвигов твоих, преподобне, повеле Человеколюбец Господь двоице мужей светносных в видении предстати тебе, каждение на основании церкви святыя Евфимии совершающе и «Осанна месту сему!» - восклицающих; ты же, благодаря Бога, вопиял еси: Аллилуия.

### **Икос 7**

Новую благодать и силу дарова тебе Господь, егда, подвижаяся в посте и бдении, явился еси страшен и неприступен демоном, яко столп непоколебим, молитвами твоими их уязвляя и далече сих отгоняя. Мы же, взирая на борения твоя, с любовью глаголем ти сице:

Радуйся, Царствия ради Небеснаго тесноту претерпевый.

Радуйся, жизни ради вечныя мирская́ вся презре́вый.

Радуйся, яко многое озлобление за Христа прия́л еси.

Радуйся, яко терпением твоим адама́нту уподобился еси.

Радуйся, блаженный небожителю.

Радуйся, лика преподобных совсе́льниче.

Радуйся, Алипие, великий столпниче и преславный чудотворче.

### **Кондак 8**

Странен миру земному показался еси, преподобне, ты бо, отечествия го́рняго взыску́я, вся помышления твоя к Небесному Иерусалиму непрестанно возносил еси; ныне же, во славе безконечней пребывая, сла́дце со святыми вопи́еши: Аллилуия.

### **Икос 8**

Весь в Бо́зе быв, прехвальне Алипие, дни и но́щи молитвенное бдение на столпе́ совершал еси и реки чудес приходящим к тебе источал еси. Сего ради, святую память твою празднующе, зовем ти:

Радуйся, яко на помощь ты призывающим помогаеши.

Радуйся, яко любити Бога и ближних нас научаеши.

Радуйся, добродетельнаго жития мудрый учителю.

Радуйся, болящих и страждущих целителю.

Радуйся, награду нетленную от Господа получи́вый.

Радуйся, угождением Богу на Небесех обитель себе сотвори́вый.

Радуйся, Алипие, великий столпниче и преславный чудотворче.

### **Кондак 9**

Всякое естество удивляется, предивный отче, великому свыше тебе дарованию, ты бо на земли невещественное житие показал еси и дар чудотворения от Господа приял еси; ныне же на Небесех у Престола Божия пребывая, и нас научаеши пети Христу: Аллилуия.

## Икос 9

Ветии многовещанныя не возмогут по  
достоянию воспети житие твое, богоносе  
Алипие, подвигами и трудами преизобильно  
украшенное. Мы же от усердия нашего  
воспеваем ти похвалы сия:

Радуйся, столпников преславный образе.

Радуйся, подвизающихся незыблемое  
укрепление.

Радуйся, добронравия благоговейный учителю.

Радуйся, чистаго жития ревностный  
предводителю.

Радуйся, всех ко спасению верный  
путеводителю.

Радуйся, в суете жительствующих мудрый  
вразумителю.

Радуйся, Алипие, великий столпниче и  
преславный чудотворче.

## Кондак 10

Спаси хотя многих, Премилосердный Господь  
яви ты основателя верна обителей иноческих, да

просвещаеши всех своими учении и ангельскаго жития образом, научая пети: Аллилуия.

### **Икос 10**

Стена тверда и крепкое ограждение был еси, всехвальне отче, во ангельстем образе подвизавшимся, преподавая им уставы жития иноческаго и повелевая тщательно блюсти́ся от козней бесовских. Они же благодарственно тебе возглаша́ху:

Радуйся, мудрый наш наставниче.

Радуйся, теплый о нас молитвенниче.

Радуйся, обидимых любвеобильный утешителю.

Радуйся, алчущих милостивый кормителю.

Радуйся, бед и скорбей прогонителю.

Радуйся, тяжкими недуги одержимых врачевателю.

Радуйся, Алипие, великий столпниче и преславный чудотворче.

### **Кондак 11**

Пение всеумиленное приносим ти, достоблаженне отче, воспоминающе, яко ты пятьдесят и три лета стоянием на столпе, зело

стражда́, вся́ тяго́ты усердно́ претерпел еси́,  
Троице́ Пресвяте́й воспева́я: Аллилу́ия.

### **Икос 11**

Светлым и радостным лицом Богу предстоял еси,  
отче Алипие, осияваемый светом Небесным, над  
главою́ твоею́, яко́ столп огненный,  
пребывающим и вся́ о́крест озаряющим. Темже́  
и наша́ сердца́, мраком греха́ омраченна́я,  
просвети и к покая́нию нас приведи, да зове́м  
ти:

Радуйся, светильниче, Божественным огнем  
пламенеющий.

Радуйся, гро́ме, во зле живущих устрашающий.

Радуйся, мо́лние, во вся́ концы́ благочестием  
блиста́яй.

Радуйся, о́блаче, верны́я от бед покрыва́яй.

Радуйся, яко́ житием твоим Небеса́ возвеселил  
еси́.

Радуйся, яко́ чудесы́ твоими́ всю́ вселенную́  
удивил еси́.

Радуйся, Алипие, великий столпниче и  
преславный чудотворче.

## Кондак 12

Благодати Божественныя исполненный,  
доблестный воине Христов, дивны подвиги  
показал еси и многая чудеса сотворил еси,  
болящих исцеляя, бесы изгоняя, будущая, яко  
настоящая, прорекая; сам же четырнадцать лет  
лютою болезнию ног страждущий, Иову  
Многострадальному подражая, Бога за вся  
благодарил еси, вопия Ему: Аллилуия.

## Икос 12

Поюще славное житие твое, подвиги, страдания  
и блаженное отшествие твое на Небеса,  
радуемся и ублажаем тя, пречудне отче, яко  
угодника Божия и предивнаго чудотворца. Ты  
же, предстояй пред Отцем нашим Небесным,  
поминай нас в святых твоих молитвах, зовущих  
ти сице:

Радуйся, яко житие твое благочестиво скончал  
еси.

Радуйся, яко с радостью ко Господу отшел еси.

Радуйся, Горняго Иерусалима честный жителю.

Радуйся, Небесных обителей блаженный  
обитателю.

Радуйся, всех призывающих тя милостивый предстателю.

Радуйся, наш пред Богом неусыпный ходатаю.

Радуйся, Алипие, великий столпниче и преславный чудотворче.

### **Кондак 13**

О преславный угодниче Христов, преподобне отче Алипие! Приими сие малое моление наше, от усердия нашего в похвалу тебе приносимое, и не остави нас, грешных, твоим заступлением, да твоими молитвами простит и помилует нас Господь, со умилением зовущих Ему: Аллилуия.

*(Этот кондак читается трижды, затем икос 1 и кондак 1)*



**ПОЛНЫЙ  
АКАФИСТИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

†

НОВОЕ  
\* НЕБО